

Pertandingan satu BH 21 MAR 2000 lawan satu di Sanggang

TEMERLOH, Selasa – Pilihan raya kecil Dewan Undangan Negeri (DUN) Sanggang pada 1 April ini, menyaksikan pertandingan satu lawan satu antara calon Barisan Nasional (BN), Redzwan Harun dengan Datuk Hishamuddin Yahaya dari Pas.

Pegawai Pengurus Pihhan Raya N26 DUN Sanggang, Zainuddin Zainal Abidin, mengumumkan nama kedua-dua calon itu di pusat penamaan calon di Dewan Tun Razak di sini pada jam 12.35 tengah hari ini sejurus tempoh bantahan berakhir.

Katanya, tidak ada sebarang bantahan diterima sepanjang tempoh bantahan mulai jam 11 pagi hingga 12.30 tengah hari.

Redzwan mengemukakan borang penamaan calon pada jam 9.20 pagi manakala Hishamuddin tujuh minit kemudian.

Pilihan raya kecil itu diadakan berikutan kematian Ahli Dewan Undangan Negeri (Adun) daripada BN,

Datuk Abdullah Kia, 54 yang diserang angin ahmar pada 26 Februari lalu.

Abdullah memenangi kerusi Sanggang dengan majoriti 1,038 undi untuk menewaskan calon Pas, Abdul Rahim Abd Latif, dalam pilihan raya umum November m.u.

Dalam pilihan raya kecil itu, Daftar Pemilih 1999 digunakan dengan Sanggang mempunyai 15,276 pengundi, termasuk 99 undi pos.

Redzwan, 49, yang juga lebih dikenali sebagai ustaz di kalangan penduduk tempatan, adalah ahli jawatan kuasa dan pengerusi Biro Agama Umno Bahagian Mentakab serta ketua cawangan Umno Kampung Jenderak, di samping anggota Majlis Perbandaran Temerloh.

Anak kelahiran Kampung Jenderak dekat sini, yang juga bekas pegawai penyelarasan masjid daerah

LIHAT MUKA 2,
RUANG 5

Redzwan diiringi pemimpin BN

DARIMUKA 1

Temerloh, pernah mengikuti pengajian di Universiti Al-Azhar, Mesir dan memiliki diploma pengajian Islam dari Al-Habab Government Oriental College, Rampur, India.

Redzwan juga mempunyai pengalaman kerja yang luas dalam bidang keagamaan termasuk sebagai penolong pensyarah Pusat Latihan Dakwah (Saudara Baru) di Sabah selama 13 tahun dan penolong pegawai latihan Jabatan Kemajuan Islam Malaysia (Jakim) selama lima tahun.

Hishamuddin, 60, pula menjadi ahli jawatankuasa Pas pusat. Beliau yang juga Pengarah Urusan lidah ras-

mi Pas, *Hurakah*, pernah menjadi Ahli Parlimen Maran selama dua penggal ketika menyertai Umno.

Terdahulu, Redzwan yang berpakaian kebangsaan coklat cerah, diarak LEBIH 3,000 penyokong BN sejauh 400 meter dari bangunan Umno Temerloh ke Dewan Tun Razak sambil membawa bendera dan sepanduk Umno serta BN.

Timbalan Perdana Menteri, Datuk Seri Abdullah Ahmad Badawi; Menteri Besar Pahang, Datuk Seri Adnan Yaakob; Setiausaha Agung Umno, Tan Sri Mohd Khalil Yaakob; Naib Presiden Umno, Datuk Seri Najib Tun Razak; Ketua Perge-

rakan Wanita Umno, Datuk Dr Siti Zaharah Sulaiman dan Pemangku Ketua Pergerakan Pemuda Umno, Datuk Hishamuddin Tun Hussein turut mengiringi calon BN.

Turut menyertai peramkan ialah Menteri Besar Johor, Perak, Negeri Sembilan, Kedah, Ketua Menteri Melaka dan Pulau Pinang, Pengerusi Perhubungan MCA, Datuk Lim Ah Lek; Menteri Sumber Manusia, Datuk Fong Chan Onn dan Timbalan Presiden MIC, Datuk S Subramanian.

Sementara itu, Hishamuddin yang berbaju kebangsaan serba putih, diiringi Menteri

Besar Kelantan, Datuk Nik Aziz Nik Mat, Presiden Pas, Datuk Fadzil Mohd Noor dan Pengerusi DAP Lim Kit Siang.

Pembangkang turut mengibarkan bendera Pas, Parti Keadilan Nasional, DAP dan Parti Rakyat Malaysia (PRM) dalam perarakan bermula dari Jalan Ahmad Shah.

Walaupun berlaku ejek mengejek di antara penyokong kedua-dua pihak, keadaan dilaporkan terkawal.

Lebih 250 anggota keselamatan, termasuk Unit Simpanan Persekutuan ditempatkan di situ bagi mengawal keadaan diketuai Timbalan Ketua Polis Pahang, Datuk Zainal Abidin Tahir.